

悼故會員黃劍雲先生

陳 展 雲

本會會員黃琇先生，于本年五月十九日病歿于閩南故里。消息遲滯，省外友好多未聞訊，最近其遺族發黃君書篋，檢獲曩年不佞去函數通，因接箋紙所附地址馳書報喪，並囑轉語測候界諸同志。用草此文，以告黃君舊雨，並誌吾哀！

君字劍雲；福建南台人。幼習海軍，學駕駛，先後卒業于福州，吳淞，南京各海軍學校，成績優異。民國十四年，全國海岸巡防處成立；以航行警告關繫海防至巨，迺于處中設警衛課，並于東沙島等處建觀象臺，職掌天氣報告。維時吾國測候事業方始萌芽，人材難得，爰由當局選派海軍軍官四人又處中職員二人，送往徐家匯氣象臺，前北京中央觀象臺，青島觀象臺等處考習；君亦在被派之列，並為考習團之領袖。君少習海軍，于數理諸科原有根柢，中英文字亦均擅長，故在各臺肄習氣象歷時雖僅數週，已能鳥瞰斯學之全部；復經事後之自研更益以積年執業之經驗，竟蔚成通人，為國內有數之氣象學家。東沙島觀象臺創立，君被命為觀象臺主任。旋內調服務于處內之警衛課主持，仍主持測候事。後復調往東沙，擢升臺長。東沙孤懸海外，生活堅苦，臺員工役多不服水土，疾病死亡之事頻見；故處中定例，每隔一兩載，內外職員瓜代一次。君司內勤時，則主持警衛課事；外出，則任東沙臺長；又曾一度擔任廈門臺長。十年來蓋始終未脫離測候界，故于預報颶風上經驗頗豐。嘗有文字發表于本會會刊。四年前著有氣象學一書，時寓居上海閘北，此書未及付梓，于一二八之役毀于火。近正致力于編著東沙島十年來之氣象，書未脫稿而作者已為古人！聞遺稿已為巡防處派員取去，深願處中職員能為之續完並刊布之！君于民國十五年加入本會；並于第五第六兩年度被選為本會理事。卒年僅三十餘歲；與史鏡清，劉治華，沈孝鳳諸君同為測候界中傑出之士，而同以英年夭折聞，悲夫！